

名

山

藏



名山藏卷之

晉江何喬遠 譔

河漕記

黃

河

漕

河

通

惠

河

沁

河

衛

河

濟

河

沂

河

泗

河

河

淮

河

汝

河

洸

河

蘆

溝

河

桑

乾

河

滹

沱

河

蓊

州

河

密

雲

河

天

津

海

口

新

河

山

東

泉

源

沿

海

塘

川

都

地

之

爲

勢

不

滿

東

南

海

水

周

地

四

維

北

海

最

遠

東

夷



女直爲黑水靺鞨之後國有長白山其巔有潭周八  
十里南流至遼東朝鮮爲鴨綠江南入於海北流爲  
女直混同江經金會寧府達五國城頭北東入海西  
夷黑水出漢張掖郡雞山今甘州南至墩煌今肅過  
三危界梁雍二州之間程子以爲卽西珥河與漢志  
葉榆澤相貫漢武開滇嶺今雲南爲滇池其地古有  
黑水舊祠而知之水顛流入蜀注海故名滇池中原  
之水黃河出西番朶甘衛西直四川馬湖蠻部正西  
三千餘里去雲南麗江西北千五百里有水湧地泓  
方七八十里高敞若星列且云星宿海也滙爲二大



澤復渚曰哈刺海東出曰赤賓河合忽蘭也里末二  
河東北流經崑崙山南爲九度河水清騎可涉貫山  
中行西戎都會爲細黃河水流已濁繞崑崙山南折  
而東流合乞里馬出河復繞崑崙山北自貴德西寧境  
至積石經陝西之河州合洮河東北流至蘭州始入  
中國又東北出沙漠經三受降城東勝諸州又折而  
東南入冀州今山西境凡九千餘里其來最遠蓋元  
學蒲察篤實之所窮也禹治水時河從積石東北而  
南計三千里至龍門爲西河冀州呂梁山石勢崇竦  
其流激震禹從呂梁北鑿龍門以殺水勢乃因其性



而導之又南而至華陰自南而東至底柱今河南陝  
州之三門山也又東經孟津過洛汭今鞏至于大伾  
今大名濬縣臨河之山也北過泲水今真定冀州北  
枯降渠至于大陸屬中山今真定邢趙深三州地也  
北分其勢播爲九河復聚爲逆河蓋迎之以入于海  
簡潔一水先儒悞分爲二其一則河之經流也徒駭  
等河故道皆在河間滄州南皮東光慶雲獻縣山東  
平原海豐縣寧津吳橋南皮諸處直達東海周定王  
五年河徙砢磬始失故道漢文帝時決酸棗東潰金  
隄在今河南延津滎陽諸縣至于大名清豐武帝時



溢平原今德州也徒頓丘今清豐縣也又決濮陽鉅  
子口今開州界也注鉅野今濟寧州卽大野也始通  
淮泗元帝時決館陶今臨清也又決清河靈鳴犢口  
今高唐州也成帝時決東郡金隄決平原溢渤海清  
河信都渤海清河高唐州一帶信都今冀州界唐玄  
宗時決博州溢魏州博州今東昌魏州今大名  
也五代時決鄆州博之楊劉滑之魚池鄆州今鄆城  
縣楊劉今東阿縣也時決東平之竹村開封之  
陽武大名之靈河澶淵太宗時決溫縣榮澤頓丘泛  
于澶濮曹濟諸州東南流至彭城界今徐州也入于



淮此河入淮之始也真宗時決鄆及武定尋溢滑澶  
濮曹鄆諸州邑浮於徐濟而東入淮仁宗時決開州  
館陶神宗時決冀州棗强大名州邑一合南清河以  
入淮一合北清河以入海南渡後河上流諸郡爲金  
所據金受河患焉其亡也始自開封北衛州決而渦  
河今壽亳蒙城懷遠間也元時決衛輝之新鄉開封  
之陽武杞縣之蒲口滎澤之塔海莊歸德封丘諸界  
當時九河逆河故道久已淪入于海

馬

煩河在今平原形存沙渠遺跡而已大伾之北不行  
矣雍州之水自西近塞內玉門關至蘭州北東至華



陰皆黃河繞帶又有弱渭涇汭漆沮澧諸水於水出吐谷渾界窮石山自張掖郡刪丹縣西至合黎山與張掖河合餘波入于流沙涇出平涼府峴頭山經西安府邠州涇陽至馮翊陽陵縣今高陵入渭渭出渭源縣鳥鼠山西北谷流入咸陽南至華陰入河汭出隴州弦蒲藪入涇漆出扶風古漆縣北經同官至耀州南合沮沮自坊州昇平縣北子午嶺今宜君縣也出富平縣合漆澧出扶風鄠縣終南山亦東至咸陽俱會同入於河冀州之水黃河自陝西西北來經古蒲汾平間又有汾衡漳恒衛沁諸水汾出靜樂縣太



岳卽霍山也至靈石縣東入河漳水二一出沾縣太  
龍谷今樂平縣名清漳一出長子縣發鳩山今潞安  
也名濁漳卽衡水也俱東北流至阜城東光縣入海  
恒水出曲陽縣東入滹水至高陽縣入易水西南流  
至行唐縣東流入滋水南流入衡水衡出靈壽縣東  
入滹沱河恒水在陝西者出吐谷渾界入臨洮因名  
洮水入于黃河在眞定者出輝縣滹水出渾源州恒  
山南流入定州至高陽合易水易出代州經易州安  
州至高陽下與曹徐滋沙諸河合至雄縣南爲瓦濟  
河過直沽入海滋出大同府之靈丘縣廻山經眞保



之行唐無極深澤諸縣東南流潯沱河出鴈門代州  
東流從真定至東鹿深州青縣合輝縣之衛河俱入  
滹幽并州之水曰玉河漕道也曰盧溝河漕道也曰  
白河漕道也曰沁水漕道也皆入于海豫州之水黃  
河自山西蒲州平陸入境經閭鄉靈寶陝澠池新安  
濟源孟津孟輦溫汜水武涉河陰原武滎澤武陽中  
祥符尉氏陳畱通許杞太康睢寧歸德諸州縣至  
毫縣合馬腸河城西北比合渦河其支流有四大槩  
久錯於祥符尉氏扶溝商水項城通許太康與壽州  
朱仙鎮之間或溢堯州出市或合渦河入淮又有伊



洛水出盧氏縣東南入  
洛水出陝西冢領山亦經洛陽縣瀍出洛陽穀城山  
澗出澗池白石山經新安縣皆會於洛合流至鞏縣  
入河濟卽沆水漕道也出濟源縣王屋山歷虢公臺  
至溫縣入河復出其南溢而爲滎卽滎澤也東出于  
陶丘之北今館陶縣也又東至荷今已涸曹州也東  
北會于汶今汶上縣也又北東入于海波爲洛水別  
流孟豬在虞城西北濟之別流衛漕道也淮漕道也  
北入于海又有漯漯雷夏灘沮汶泗淄濰漯出長山  
長白山西北流經章丘新城諸界漯出歷城縣入



濟雷夏澤在雷澤縣灘沮二水之別流自陳留浚儀陰溝至蒙爲灘東入于泗泗漕道也出泗水縣陪尾山又出鉅野受沛水下流于睢卽汝水汶漕道也淄水出萊蕪縣原山達臨淄東至壽光灘水出瑯琊郡今諸城縣經高密昌邑灘縣東北俱入海荊州之水其澤藪曰雲夢又有江漢川九江沱潛江水發源于四川之梁州岷山青城諸山之陽出茂州汶川縣東別爲沱經叙瀘重夔入瞿峽過巫山出夷陵州荊州至于東陵今巴陵縣合洞庭過漢陽府合漢水至黃州九江二府合彭蠡今鄱陽湖口也經安慶池州太



平應天諸府儀真通州入海漢出陝西漢中嶓冢山之下始爲氏道縣東源漾水東至武都爲漢過武東中州今武當也爲滄浪之水過三澨郢也今爲承天府至于大別山今漢陽也入江經黃州九江合鄱湖諸水同趨海沅辰漸元叙酉澧資湘九水是曰九江皆合于洞庭過巴陵合川水入武昌合漢水東南下入楊子江衝北岸甚急與江水俱入海揚州之水北至于淮東南至于海東合江西江東諸水經南贛汀吉合衡永長沙別派入袁州出臨江會贛水入洪都合瑞洪所聚饒撫信浙之諸水于鄱陽今九江府蓋



名其入隙處與前江漢諸水同趨建康今南京也蓋諸方水道所湊東南合蘇松常三郡水匯而爲震澤在吳縣南五十里又吐納常之宜興江陰鎮之金壇百瀆西來衆水而下溢爲三江吳江界于吳松江震澤之間去吳松江七十里分東北流者爲婁江東南流者爲東江皆自靖江太倉東北入海北爲江南通泰至海門縣而入海所謂江漢朝宗者也禹時江淮未通賦不及于海至吳夫差與晉會盟黃池始開蘇之邗溝今運道也自常之孟瀆鎮之京口以通于江自揚之儀真亦開溝以通于淮隋因廣之今貢賦皆



自江淮達京師也廣西之水一曰灘江源出海陽山  
南流五里與永州湘水北分爲二故曰灘又名桂江  
合桂水至桂林城下合相思江入昭潭今平樂府會  
平富樂荔臨賀諸水至梧州爲府江一曰左江又名  
藤江發源交趾至古邕州今思明府也經容縣合容  
江經藤縣合繡江經南寧之合江鎮與右江合入橫  
州又名鬱江一名右江又曰黔江源出雲南之富州  
之西洋江入田州經象州今柳州也合柳江至南寧  
府之合江鎮與左江合二江合入潯州大藤峽出爲  
潯江貴州之水曰盤江源出四川烏撒府普暢寨東



江以夜郎地又爲黔中隸牂牁郡今貴安州也東北  
一流入安南衛經廣西泗城州入慶遠府烏泥江下  
合柳江卽爲右江以上三江分合爲二入梧州大江  
流經廣東封川德慶合肇慶之端溪又名西江至  
番禺流入于南海廣東水一出博羅縣西流者爲東  
江一出江西大庾嶺爲潯水至韶之英德爲貞陽峽  
一出湖廣郴州經武崗南入南雄之樂昌爲武水又  
南與潯水合而爲曲江過三水縣與西江合卽上牂  
牁江也皆合至於南海縣入于海雲南之水曰滇池  
出徵江嵩明盤龍等江九十九泉源廣末狹若倒流



者故云滇大理之葉榆河卽西珥海及瀾滄諸江其  
流不出本省惟廣南西洋江則繇廣西經右江入于  
海其四海之水北海遠不可窮東北至於朝鮮東至  
於登萊東南至於閩浙島夷日本琉球南至交廣瓊  
崖又南至於安南占城真臘等夷國而西南至於交  
趾海外西南夷入東南夷海島中互市皆自崑崙山  
前而行海水東流三歲以爲來期西流三歲以爲歸  
期乃知雖有四海勢盡趨東也是皆禹貢之遺也今  
郡縣異其名故稍差次焉而河漕之治興  
黃河禹之治河治水而已國家引以資運焉河東也



入海其性也今自淮及徐引之南注五百有餘里  
凡四瀆會河之處泛溢易決固其勢也國初都南京  
未引以資全運則時決時治之而已其始元年決曹  
州遣大將軍徐達往治達開場場隙引河入泗以濟  
北方之南運者七年決開封潰太黃等隄詔河南參  
政安然塞治作者三萬人十四年河溢灌原武祥符  
中牟諸縣有司請治上曰天災也護隄而已勿困民  
十七年決杞入巴河被河南數州遣使者率所在丁  
壯塞之二十三年決鳳池逕夏邑永城諸縣命發興  
武等十衛士卒與歸德屬縣隄決隙其秋決南陽漂



沒民舍遣使者賑贍萬五千七百餘戶發淮揚蘇松民丁二十五萬二千餘人修築岸隄明年決原武黑洋山東經開封城北五里又南行至項城經潁州潁上東至壽州正陽鎮全入于淮故道遂淤又繇舊曹州鄆城兩河隙漫過安山而元會通河亦淤其明年決陽武浸淫及陳州中牟太原扶溝十一州縣詔興卒作治其後洪武三十年秋決開封城不受水者一面其冬蔡河南徙入陳州永樂三年決馬村堤其明年隄陽武黃河決岸及中牟汴河北隄而是時成祖遷都於北京矣九年河決壞民田廬舍益甚命工部



侍郎張信往視信言祥符縣有黃河故道岸與今河平宜可濬興安伯徐亨工部侍郎蔣廷瓚率運木夫同侍郎金純相治之時工部尚書宋禮督開會通河命禮兼總之詔給開浚民丁米鈔蠲戶內是年租稅河南山東人皆喜願効力凡役丁壯十一萬四千人三月成功自是與會通河合開運河焉引河南注資之爲利而河失其北流之性衝決過甚運河反淤利害參矣明年決陽武中鹽隄二百二十餘丈被數縣隄與原武大賓隄俱急流衝處決塞時有遣工部主事蘭芳按視芳捲土爲埽樹椿捍堤圈木作圈釘椿



其中實以石脚貫橫木表屬之正統三年決邳州灌  
諸邑山東魚臺望鄉嘉祥尤甚命隨宜捍築十三年  
河決新城八柳樹源漫流山東經曹濮衝張秋潰沙  
灣東堤奪濟汶入海路以去諸水從之泄壞敗民廬  
無算景泰三年天久雨沙灣復大決近河地皆淹沒  
命工部左侍郎王永和工部尚書兼大理寺卿石璞  
巡撫山東右都御史洪英工部左侍郎趙榮先後治  
不工者六年翰林侍講徐有貞自請行詔以爲僉都  
御史有貞至散遣工卒自行河相度明于心乃疏言  
禹之行水水之道也宜首疏其勢勢平乃治其決決



止乃濬其淤繼之以法因作渠牐隨宜先後之渠則  
異流同歸牐乃上下櫛比以次啓閉渠起金堤張秋  
之首西南行九里至濮陽濼又九里至博陵陂又六  
里至壽張沙河又八里至東西影塘又十有五里至  
白嶺灣又三里至李峯而上又二十里至蓮花池又  
三十里至大豬潭越范暨濮上而西凡渠數百里經  
澶淵接河沁河沁水過則害微則利有貞節其過導  
其微復渠而牐之河流旁出不順者堰之於是水不  
東衝河灣更北出濟漕而河西鄆東曹南鄆北且灌  
田數十萬頃有貞參綜古法加神用焉乃犍以水門



捍以長堤堰有九崇三十有六尺厚十之長百之門之廣三十有六尺厚倍之堤之厚如門崇如堰長倍之架濤截流柵木絡竹實之石鍵以鐵蓋合土木火金而平水性而報功成又導洛泗之源於山滙澶濮之流於澤潯漕渠繇沙灣北至臨清南至濟寧作放水牕于東昌龍灣魏灣凡八水盈丈則開而洩之皆導古河以入海因取金水子母之義沈玄金爲物象鎮焉始議者欲棄渠弗治以海漕或議鑿渠發京軍有貞第請蠲河濱牧馬傭而已有言沮者上使中使問之有貞示以二壺一壺之竅一壺之竅五注水



二壺五竅先涸中使還報上上惟有貞之所爲蓋役  
五萬餘人用木十萬竹倍之鐵斤十有二萬錠三千  
緡八百釜二千八百麻百萬斤荆倍麻藁倍荆土  
石亡算而用官糧五萬爲日五百五十有五而已是  
爲景泰四年是役也君子以爲才天順五年黃河溢  
潰汴梁土城溺者不可勝計詔工部右侍郎薛遠往  
視遠分治旣績乃作石牕於揚州門以限內外時啓  
閉明年發丁壯千開祥符曹家溜弘治二年河決原  
武支爲三一決封丘荆隆隙漫祥符長垣而下趨張  
秋衝會通河奔放于海一出中牟下尉氏一溢蘭陽



儀封考城歸德至宿州彌漫不可禁議者幾請徙河南省避之孝宗以爲憂以白昂爲戶部左侍郎往治昂舉兵部郎婁性佐之役丁夫二十五萬築陽武長堤以防張秋引中牟之決以入淮濬州古睢河以達泗自小河西抵歸德飲馬池經符離而南皆濬令深廣又疏月河十餘以洩水塞決隙三十六繇是河入淮汴入睢睢入泗泗入淮以達海而水患寧昂又以河南入淮非正道恐卒不能容復自魚臺歷德州至吳橋修古隄又自東平北至興濟鑿小河十二道引水入大清河及古黃河以入河蓋東北分治而東南



主疏五年復決荆隆口東注潰黃陵岡下張秋鎮入  
漕河與汶水合而北行朝議遣工部左侍郎陳政督  
治未幾政卒廷推劉大夏爲副都御史往大夏以張  
秋鎮上流爲儀封縣之黃陵岡黃陵岡上流爲滎澤  
縣之孫家渡皆宜疏治檄河南參政朱瑄僉事張鼎  
董之其明年張秋大決奪汶入海水怒益難垂成而  
敗者屢矣論者洵洵謂宜復海運孝宗復命太監興  
平江伯銳往兼治乃於上流西岸鑿月河三里許屬  
之舊河使漕通不與河爭道乃鑿孫家渡口河七十  
餘里濬祥符四府管淤河二十餘里以達淮疏賈魯



舊河四十餘里繇曹縣糧道口出徐州運河支流既分水勢漸殺乃塞黃陵岡之決荆隆口之源築兩長堤感水南下繇徐淮故道其自武陵屬之碭沛凡三百六十里曰太行堤自荆隆口起于家店及銅瓦箱東橋抵小宋渠凡百六十里曰新堤又以兩堤綿遠河或失守必復至張秋患漕相地于舊決之南一里許用減水壩法植木爲杙中實輒石上爲衡木著以厚板上塹巨石屈鐵鏈之液稷埴之壩成廣袤皆十五丈又其上斲石爲竇五梁而涂之梁可引纜竇可通水溢則衝齧殺涸則河漕存自春徂夏張秋之決



塞賜名安平鎮興銳大夏皆錄功進祿秩有差而遷  
張弼爲副使專理河事踰年孫家渡漸壅而奔流壘  
復疏治之繇朱仙鎮以復項城故道蓋五年而成工  
李東陽安平鎮減水壩詩黃陵岡頭河水黃衝沙走  
石聲礮破北趨平原下廣澤直壤運道無津梁坐令  
漕舟百萬若山墮民船賈舶徒紛麗帝遣臺臣出治  
水水性碑兀難爲降千金作埽萬失力頃刻下墮輕  
豪芒臺臣焦思廢食寢夜夢神禹授以玉簡青珠琅  
水行在導不在障豈以水石爭濤龍地靈順軌水怪  
伏河遂南徙歸徐方因高爲陵下爲澤復有石壩磊  
華長如岡豐功偉績不可以數計此乃餘力非末強  
億昔文皇建都向燕薊中導汶泗通漕綱尚書宋公  
富經畧世上但識陳蔡襄武功何人亦奇士盛以勳  
績爲文章四十餘年復一決嗟此之績安可忘帝命  
儒臣分書刻金石此記正屬臣東陽使船東來一登  
臨風日馳爽炎天涼是時臺臣入兵省我在江湖思  
廟廊但願此兩不墮河不徙縱有帶礪無滄桑按陳



恭襄名瑄武  
功徐有貞也

始河自清河隙入淮至劉大夏治之自

宿遷小河隙入淮則北三百里矣已又北三百里至

徐州小浮橋入淮正德四年溢皮狐營決曹縣溫家

馮家等隙又北衝黃陵岡埽座溢入賈魯河敗張家

隙等處縷隄循運河大隄東南行賈魯河下流淤亦

出張家隙合而南注遂決楊家隙道曹單城下直趨

沛飛雲橋較前徙又北百二十里朝廷勅工部左侍

郎崔巖兼右副都御史往治巖發丁夫四萬餘人塞

垂成濬潰之代以右侍郎李堂屬薊盜起未卽工八

年復決黃陵岡是年決曹縣以西從縣北東行曹單



民被害益甚以命右副都御史劉愷愷爲大堤起魏家灣亘八十餘里至雙堦集御史趙璜隄三十里續之曹單以寧其後十二年河決城武縣沒焉嘉靖六年河決曹單城武楊家口梁靖口吳士舉莊衝雞鳴臺運道大阻下廷臣議其明年河決淤廟道口三十里吳人盛應期起田閒爲總河都御史謀疏趙皮寨支河綿亘數百里以濟運道乃趙皮寨爲上流地高於河土皆沙疏隨淤功弗就應期日夜止宿水次益卒數萬治之益無成百姓怨應期坐免歸乃命工部左侍郎兼僉都御史潘希曾往代明年豐沛單三縣



隄成是歲飛雲橋之水北徙魚臺穀亭舟行閘面沛  
豐以北稍遠水患久之復決趙皮寨穀亭流絕而廟  
道口復淤議者欲引沁鑿衛置敖倉衛輝繇渦經汴  
達陽武陸輓之始繇衛北運言人人殊時治河者工  
部侍郎劉天和專修復故道而已天和既濟河未幾  
河忽自夏邑太丘等集衝數隙轉東北流經蕭縣出  
小浮橋下濟二洪趙皮尋塞若天助然是爲嘉靖十  
三年蓋河勢南徙便運道矣十九年決睢州野雞崗  
經渦入淮孫繼口出徐之流淤二洪大涸河臣若河  
南山東撫臣皆獲罪上命兵部左侍郎王以旂兼都



御史督理以旂言所資河者以濟運也河今南徙築  
疏山東諸泉入之洪沛以南障之隄如會通河制運  
通矣許之以旂役丁夫七萬開李景高支河一道引  
水出徐濟洪八月而成上嘉悅晉秩賞賚是爲二十  
一年是時河益南徙益被五河蒙城臨淮諸州邑鳳  
泗之北祖陵在焉議者以爲憂三十一年決房村約  
淤三十里都御史曾鈞役丁夫五萬六千有奇濬之  
二月而成三十七年河忽北徙新集淤而爲陸二百  
五十餘里開視故道高三丈有奇河分流弱離爲十  
一河南山東徐邳一帶苦之四十四年河盡北徙出



沛之飛雲橋橫截逆流漫散湖陂以達徐從沙河至  
二洪浩渺無際而河變極矣時工部尚書朱衡與右  
僉都御史潘季馴請開盛應期新河自南陽達畱城  
百四十一里有奇濬舊河自畱山連境山五十三里  
有奇役丁夫九萬一千八閱月而成而水南趨秦溝  
隆慶二年河專繇秦溝入洪而河南北諸支河悉併  
流秦溝三年四年河大漲徐州上下茶城至呂梁兩  
崖束山不得下又不得決五年乃自雙溝而下北決  
十餘隙枝散幹微淤匙頭灣八十里而河變又極矣  
議者欲棄幹河而行舟于曲頭集大枝間冬初水落



則幹已平沙而枝復阻淺損漕舟千有奇則又議黃河運而開膠沔二河海運之議起矣都御史潘季馴則惟求復故道而已乃役丁夫五萬開匙頭灣塞十餘隙大疏八十里故道漸復六年少保工部尚書朱衡兵部侍郎萬恭悉罷膠沔議一意事徐邳河役丁夫五萬有奇築南北兩隄延袤三百七十里始議列鋪布夫修守如河南山東黃河例萬曆五年河決崔鎮淮決高家堰洪流四溢連年不治詔復以季馴爲右都御史總理河漕維時人人言海口當疏季馴言海口不能以人力疏治而可以水勢衝決計莫如築



高家堰塞崔鎮東河淮正流使並趨入海天子可其

奏季馴爲之三年而高家堰成一夕黃浦涸得龍首

以獻其大專車時以比龍首渠云

潘季馴字時良烏程人嘉靖庚戌進

士其以都御史治河嘗乘小艇行河風雨大作震撼波濤中幾覆桂樹抄乃脫萬曆中以刑部侍郎再起治河築高堰捍河而人之海役卒三年凡築土隄丈以億計石堤以數千計塞河口以百計濬運河以萬計開壩涵洞之屬創以數十計而高堰工完鉅季馴時與僉伍雜處風雨葦舍中無間也累遷南刑部尚書以言官蜚語坐鐫秩季馴去河復不治後以右都御史起季馴于家滿九年復原官爲太子少保工部尚

書

漕河漕之道三曰陸曰海曰河陸之運費海之運險  
淮河爲宜元人外有海運而內有會通之河會通河



者自任城分汶西北流至須城之安民山入清濟故  
瀆通江淮漕又自安民山開河北至臨清凡二百五  
十里引汶絕濟直屬漳御建牖三十有一度高低分  
遠近以節蓄洩此其舊也蓋山東濱海水東注海而  
元人逆而西之明初太祖都金陵餉悉仰給于南江  
西湖廣之粟江而至兩浙吳會之粟浙河而至鳳泗  
之粟淮而至河南山東之粟黃河而至所給遼東軍  
士一用海運而舳艫侯朱壽航海侯張赫常掌之其  
末年河決原武漫安山湖自汶上至臨清五百里悉  
爲平沙而會通故道闕不問矣成祖治京於燕自上



供以及百官六軍悉仰江南梁稻則用海運法兩浙自浙入于海吳會自三江入于海淮北河南自河淮入于海山東各以濱海州縣入于海皆會直沽達于天津而懷慶衛輝以其舟順衛河入天津來會俱遡白河逆于張家灣輸京師而海舟時溺計臣曰險乃令江南之運皆入高寶諸湖渡淮達黃河陸運百七十里入衛河指天津輸京師而車徒亡算計臣曰費於是屢有言開會通河便者濟寧同知潘叙正以請上使工部尚書宋禮相度還奏便於是遣刑部侍郎金純發丁壯十有六萬塞舊曹州鄆城兩河口滹河



舊曹州一帶河道開黃河故道起開封城北下  
逮點臺塌場口以益漕河而命禮董之元人故引山  
東泉悉入汶河又以汶雜洸洸併泗不能勝東注則  
爲堽城壩截會洸泗西南流以會于濟寧之天井閘  
而分水焉天井閘者唐尉遲敬德之故閘也始敬德  
爲盧龍節度使爲一鎮餉引河爲之而元人因其故  
蓋以天井之南注之淮安淮安捷入海以天井之北  
注之天津天津捷入海而陽穀壽張之交地勢控天  
井者數丈水留不走直可載數十石耳故終元之世  
不敢廢海運而禮以爲憂有戴村老人白英謁禮曰



南旺地聳盍分水於南旺導汶趨之母令南注洸北  
傾坎其南九十里使流于天井其北百八十里使流  
于張秋樓船可濟也禮乃造梁室汶之入洸者壩戴  
村迂而遠之遏汶之入坎河者開新渠百十有餘里  
抵南旺分注之九年道大通從徐州至臨清幾九百  
里過淺船約萬艘載約四百石糧約四百萬石若涉  
虛然上爲罷海運專事會通矣禮卒屬餉道平江侯  
瑄瑄尋宋轉運使喬維岳所鑿淮陰故道開清江浦  
引水繇管家湖入鴨陳隙達淮循宋轉運劉璠所開  
沙河道浚新莊河一帶葺漢陳登所築高家堰防淮



者使淮水不東侵隄清江浦鉛鉢池柳浦灣迤東障  
黃河之漲乃閘清江嚴啓閉令都漕掌鑰非漕船鮮  
船莫得繇閘進堤立淺鋪築牽路植柳陰穿井泉自  
淮以北一帶而運舟至淮者無過潮渡河之勞阻國  
自作京干燕始命平江侯陳公瑄海漕歲百萬石既  
而議通河漕亦屬平江治之平江爲人鬪爽寬穀知  
害識古今成敗恒以濟人爲心乃浚濟寧臨清之河  
築南望高郵之堤刻日梁徐州二洪之巨錯浚儀真  
瓜州之潮港開白塔之河疏清江之浦自徐至于臨  
清建甯四十有七以畜洩水自淮至于通州濱河置  
舍五百六十八居卒以治淺緣堤鑿井樹木以待賜  
者置倉於淮安徐州臨清通州以便轉輸初漕僅倍  
於海後乃五之而事不墜兵不疲其法至于今是賴  
嘗論分倉漸運之便漕運官軍之勞馬快船夫之弊  
亦皆可施於今者蓋自有漕以來鮮蓋自有漕以來  
有武臣與漕俸有勳績如平江者也



宋禮之功在會通陳瑄之功在淮南景泰初徐有貞  
沙灣之役兼濟運道北至臨清南至濟寧四百餘里  
而弘治五年中劉大夏往張秋之役築臺立表貫索  
網聯巨艦穴而窒之士沉而埽壓之繞以石隄輔以  
混柱度可三里許二人皆有功於漕嘉靖初沛縣河  
關沛河上接南陽穀亭沽頭下出留城南陽閘左滕  
縣而右魚臺閘出其中其地高聳滕沛間有昭陽湖  
者又竄下黃水每漫漕趨之諸臣請開新河於昭陽  
湖東其地東北接沙河南接留城延袤百四十里聳  
南陽等明年總督河道御史盛應期以請許之約



作者六萬人費二十萬計工已半屬旱災脩省言

多咎新河乃詔罷應期亦罷

初應期議開新河管河郎中柯維熊贊之甚力

應期督丁趨迫人頗怨驚朝議罷役應期請毋停工  
緩之一月保可終事維熊復甚言其不便應期亦上  
疏自理部議上應期維熊俱坐罷職應期果毅任事  
既奏開新河因謬議紛起欲急於見功以杜衆口遂  
以嚴急興怨未成而罷然其所開新河後三十  
餘年卒循其遺迹疏之運道至今蒙其利云

年河決趙皮寨穀亭流絕濟寧徐沛間淤數百里總

理河道右副都御史劉天和言慮欲行河恐故道難

復惟濬淤修閘復先朝成憲爲便因培低閘濬月河

爲減水順水閘壩作者十四萬人費七萬餘爲之三

月成上晉天和秩四十四年河決沛縣等處流直秦



溝淤運道百餘里總河者爲潘季馴季馴之議求復故道而已而工部尚書朱衡則開湖東新河如盛應期所治引鮎魚諸泉薛沙諸河注其中灞三河口淪舊河修馬家橋堤遏河出飛雲者盡入秦溝是名夏鎮運道大通爲穆宗元年黃河衝塞改行茶城與漕交會其後隨淤隨濬又復別濬之然治河之臣先後不一徒知別濬行河而不知夏秋之間黃水大發清弱黃強當其交處倒灌入河河渠淤澱固其勢也苟與黃會何往不淤故季馴之論治水惟求故道順治之而已四年高家堰大潰淮湖之水浹洞東注合白



馬汜光諸湖決黃浦入淺而山陽高寶興鹽諸邑  
爲巨浸每歲之夏淮陰畚土塞城門竇穴出入而城  
中衢可舟也淮旣東黃水亦躡其後濁流倒沂清口  
遂堙而決水行地面宜洩不及上源停住而鳳泗間  
亦成巨浸矣上卽家起季馴治之季馴緣河築隄百  
五十里近者爲縷隄洩驟漲遠者爲遙隄防橫溢旣  
成二洪流駛如故季馴之言曰河性湍悍善溢多徒  
者流漫而沙壅也法莫若以隄束水以水攻沙無散  
漫無填闕河乃可治此令神禹復生不易吾言矣六  
年河決邳州運道阻總河都御史翁大立復議開洩



口河以遠其勢季馴言沕與黃河相首尾今河南決淮揚北決豐沛漕渠不相屬沕處中將焉用之季馴尋被劾歸詔朱衡與總河都御史萬恭履視則沕口限嶺阻石竟報罷恭復以仁愿總築三受降城法爲徐邳順水隄三百餘里運艘束於河流邳睢之間可以稼嘉隆間治河者以衡恭季馴爲績恭之言曰行河有八因因河未泛而北運因河未凍而南還因風南北爲運期因河順流爲運道因河安則修隄因河危則塞決因冬春則沿堤修治因夏秋則據堤防守守有一曰官守曰民守防有四曰晝防曰夜防曰風



易雨防有三策焉夏秋水發運舸度河漕既愆期  
無全算是謂無策運艘入閘國計無虞黃水溢隄  
隨缺隨補是謂中策四月方終舟悉入閘夏秋之際  
河復安流是謂上策閘有三曰石閘叢石爲之有龍  
門有鴈翅有龍骨有燕尾曰活閘漕長恐洩木板爲  
之視閘廣狹而多寡焉口土閘閘水出口與河上下  
相懸爲壩留水以與河接河堤之法有二有截水堤  
有縷水隄水之爲性也專則急分則緩而河之爲勢  
急則通緩則閉縷水之隄因河勢而束之也治水者  
便之截水之隄遏河性而阻之也治水者忌之築隄



有二夫編設曰徭夫名募曰募夫借派曰白夫有隄  
無夫與無隄同有夫無舖與無夫同隄以防河夫以  
守隄舖以居夫參相得也行水之法治有餘先下流  
治不足先上源季馴之言曰治河之策莫難於我朝  
而亦莫善於我朝自元宋以前欲避河害而已故賈  
讓不與河爭我朝藉河資運不與爭得乎此謂難矣  
然以治河之工收治漕之利漕不可一歲不通則河  
不可一歲不治故元宋以前黃河或北或南曾無寧  
歲我朝河不北徙者二百餘年一舉兩得所以爲善  
又曰或問河堤之決可罪河乎曰河無不暴要在守



耳譬孟水執事不戒損孟一隙水必迸出凡罪水者  
悉官吏委避自解也

通惠河卽玉河也發源昌平州神仙泉過榆河會一  
畝馬眼泉遶甕山後匯爲七里灤東入都城西水門  
貫積水潭積水潭者皇城內西海子也又稍東從月  
橋入內府環繞宮殿南出玉河橋繇大通橋至通州  
與白河合袤一百六十里元郭守敬所鑿十里一閘  
蓄水濟運元人名通惠焉國朝廢不治天順二年漕  
運總兵官都督楊茂先請修之以省從張家灣陸輓  
者命戶部尚書楊鼎工部侍郎喬毅往視還言元人



舊引白浮泉水往西逆流經山陵恐不宜地理一畝  
泉經白羊口山溝雨水衝截西湖草橋泉源不深遠  
俱難引惟玉泉龍泉及月泉柳河等泉皆出西北一  
帶山麓誠從西湖源頭閉分水青龍閘引諸泉水匯  
湖從高梁河量分其半仍從金山河出餘自都城外  
濠流轉與之會更洩入三里河水閘而併流大通橋  
河隨旱潦爲啓閉庶運舟近倉爲便明年發軍夫九  
萬餘往治尋以災異罷後成化十一年詔平江伯銳  
等濬之一年而成自都城東大通橋抵張家灣渾河  
口百六十餘里漕船稍通然坐獨引西湖泉水之半



不踰二歲淺涸如舊嘉靖六年巡倉御史少仲請復  
開之上使戶部侍郎王軌工部侍郎王詔往議軌等  
言漕國計也必如元人引白河故事令大船皆可直  
達京師則必大興工役其費稍鉅惟據見存故閘稍  
修治之聽小車剝船竝行而載且以便歸運之軍詔  
可

白河源出胡地經密雲縣靈霧山爲潮河川而富河  
響口河七度河桑乾河三里河俱於此會名白河南  
流經通州合通惠及榆渾諸河至張家灣總名曰潞  
河竝南流楊村以北通惠之勢峻若建輶白河之流



淤沙易阻夏秋水漲則懼潦冬春水微則病涸藉濬治焉

沁河出沁源縣綿山東谷經太行山麓至武陟縣境與黃河會而東注達徐州前代嘗引以通衛國朝猶然後河趨陳潁入淮不與沁合乃開沁達徐而入衛之道湮其後建言者皆請引沁達漕然沁終不能入漕也議遂寢

衛河舊名御河出輝縣蘇門山北泉東北流經濬大名館陶諸郡縣下流會淇漳諸水過臨漳分爲二其一北出經大名至武邑以入滹沱其一東流經大名



東北出臨清至直沽會白河入海今爲運河自德州而下漸與海近卑窄易衝潰永樂十五年命宋禮經度二小渠泄洪水入土河復穿小渠抵海豐縣大沽河入海正德十三年引漳水西通入河其後有言引黃河入衛通漕以達京師者然皆不行

濟河發源爲沆旣東爲濟出垣曲縣王屋山旣見而伏東出濟源縣二源合流至溫縣歷虢公臺入河復出河之南溢爲滎又東出於陶丘又東北至壽張縣安民合汶水北東至博平入海此汶之故道也元時作堽城壩遏汶入沆南流至濟寧合沂泗二水會于



淮我朝遏汶入南旺於是洸沂泗自會濟而汶不復  
通洸今沂州亦有汶河一出蒙山東澗谷一出沂水  
縣南山谷俱入邳州河

沂河源出曲阜尼山西南分流爲二一西流至兗州  
府城東金口壩上與泗會一與泗南下二水南趨其  
故道從塔里河出師家莊開河元時作金口壩遏二  
水繇黑風口入濟又南流會洸水至濟寧出天井關  
國朝因之又有出沂水縣艾山者會家陀沂水諸泉  
與沂水汶合流至邳州入淮按職方氏青州其浸曰  
沂禹貢于徐州亦曰淮沂其又蓋青沂源也徐沂



流也

泗河源出泗水縣陪尾山四源竝發循山西流二里過卞莊城合爲一又西流至兗州府城東又轉南流經橫河與沂合元人遏令繇黑風口入濟西南入于河復出河之南溢爲滎又東出陶丘北又東至荷澤又東北至壽張縣安民亭合汶水又東北至博平縣入於海又自泰山北與齊東南諸谷水西匯于黑水灣又西北匯于柏涯灣抵渴馬崖崖北又湧爲趵突等七十餘泉復溢爲大小清河元人壩金口傍有河西通濟沅竝入會通河永樂中宋禮開會通河自安



山河西南行繇壽張而北至東昌又西北抵臨清引汶絕濟屬之衛

淮河出平氏縣胎簪山經桐柏其流始大至泗州龜山橫截遂界沙湖洪澤諸湖出清河口與黃河會東入於海

汶河三源一名小汶一曰大汶一出萊蕪縣原山陰與寨子村合而南流會洸水至濟寧天井間以濟運國朝因之山東水汶竄大伏秋防暴漲焉

洸河汶支也水經不載元人于寧陽堽城作斗門遏汶益漕洸名始著自寧陽縣西北南流至高吳橋合



寧陽諸水經濟寧城東與沂泗合入天井關元八  
道也宋禮分水南旺汶不復堽城會洸然洸不可無  
紀也

盧溝河出太原天池伏流至朔州馬邑從雷山陽發  
爲渾泉而爲桑乾河鴈門應州雲中諸水皆會經太  
行山入宛平縣界東南至看舟口分爲二一東流至  
通州高麗莊入白河是爲渾河一南流至霸水合易  
水又南至丁字沽入運河仍從本河是河過懷來東  
兩山間至京城西四十里石經山東地平而土疏衝  
擊震盪遷徙不常往代雖嘗修築國朝特重云



桑乾河發源馬邑金龍池百斛湧泉遞遞東下從大  
同古定橋抵保安州又流至盧溝會于天津起盧溝  
橋務里村至古定皆可舟議者欲道宣大運道以中  
道有石阻乃罷議

渾沱河出繁峙縣泰戲山匯爲三泉流稍延漫循太  
行掠晉冀蜿蜒而東又東北至青縣分山河口入運  
河下直沽入于海班史稱徒駭是也後就湮不可據  
至國初流藁城迄今又不知幾徙或謂是河東趨真  
定繇晉州紫城口南入寧晉會衛河入海其故道自  
紫城口衝潰東流道非其故而東鹿深州被冲後



屢議濬復中官大家重棄成田不欲也

薊州河運薊州軍餉也國初用遮洋船從直沽出海轉餉薊時有漂沒天順二年開直沽河焉

昌平河運諸陵官軍餉也起輦華城外安濟橋抵通州渡口止袤百四十五里

密雲河運密雲官餉也本白河上流自牛欄出而下與潮河川交會水勢深廣嘉靖三十四年總督薊遼保定都御史楊博請捍塞就通利合以濟餉四十二年總督劉燾發卒濬治而潮河川直達通州凡密雲鎮歲餉十萬悉用小舟轉粟省車輓入河費上嘉壽



賜賚之

天津海口新河河長十四里四十八步繇王家淺抵冀家灣開運道

徐沛山東諸湖在運河東曰水櫃儲泉以益不足在運河西曰斗門分漲以洩其餘南旺湖屬濟寧州週圍百五十餘里運渠貫其中東岸爲南旺東湖汶水自東北來界爲二界之北爲馬踏湖南爲蜀山湖俱屬汶上縣又南爲馬場湖屬濟寧皆綿延可七八十里又南八十里爲南陽湖卽獨山湖屬魚臺縣圍七十餘里引沙河逕其中入新河西岸爲南旺西湖北



三十里爲安山湖屬東平州屬八十三里餘百二十步南百九十里爲昭陽大小湖大湖袤八十里小湖殺三之一連而貫圍八十里餘北屬滕南屬沛放水入薛河從金溝口以達舊運河孟嘗君封薛故名薛河也已而河決乃棄沽頭開新河于湖東南陽在東昭陽在西去湖水益遠蒲灣泊或家湖屬汶上赤山湖微山湖呂孟湖張莊湖四湖連注八十里屬徐州引薛河出地浜溝入新河蛤蟆湖長二十里周湖如之連汪湖殺四之一柳湖猶是俱屬邳州落馬湖長六十里茅湖次之黃墩湖殺三之一侍丘湖長三十



里含基湖如之埠子湖袤增五十里俱屬宿遷縣大  
莊湖長十里崔鎮湖三之俱屬桃源縣杜村湖長  
十里萬家湖如之俱屬清河縣是諸湖者運河之外  
也而藉以資運管家湖在淮安府白馬湖長三里泥  
老湖三而十之卽寶應湖也界首湖一名津湖里與  
白馬埭俱屬寶應縣新開湖長三十五里湖東夾河  
是名康濟屬高郵州故名高郵湖也運經高郵九十  
里湖居三之一焉故東直南北爲隄舟行其中西風  
與舟觸輒敗弘治六年戶部侍郎白昂請更鑿複河  
利牽挽旣成賜名康濟河也邵伯湖長十里有八屬



江都縣是諸湖者運道之經也南道江北通淮歲脩之費視南旺諸湖倍

山東泉源百八十出濟兗二府一十六州縣新泰萊蕪泰安肥城東平平陰汶上蒙陰之西寧陽之北九州縣之泉俱入南旺分流是爲分水派也泗水曲阜滋陽寧陽迤南四縣之泉俱入濟寧是爲天井派也鄒縣濟寧魚臺嶧縣之西曲阜之北五州縣之泉俱入魯橋是爲魯橋派也滕縣諸泉近入獨山呂孟等湖以達新河是爲新河派也沂水蒙陰諸泉與嶧縣許池泉俱入邳州是爲邳州派也皆所以濟漕河也



徐呂而下黃河經行無藉泉矣

立春後東風解凍河邊人候水初至凡一寸則夏秋  
當至一尺謂之信水二三月桃始花永泮雨積川流  
盛長謂之桃花水春末蕪菁花開謂之菜華水四月  
壠麥秀謂之麥黃水五月瓜實謂之瓜蔓水朔野之  
地深山窮谷永堅脫泮盛夏消盡而沃蕩山石水帶  
礮腥併流乎河故六月中旬謂之礮山水七月菽豆  
秀謂之豆華水八月荻蘆華謂之荻苗水九月重陽  
紀節謂之登高水十月水落安流謂之復槽水十一  
十二月斷水雜流乘寒復結謂之感凌水非時暴漲



謂之客水皆當巡守而伏秋勢氣盛則當晝夜防此其資國儲者也若夫湖塘陂堰以至川原所過渠溝可引在郡國多有之民間往往藉漑浸舟行并飲之利善爲政者或疏以便民或隄防之以捍患太祖初定天下詔民間有以水利奏者遣行視脩治蓋其重也茲記其要且大者附焉

沿海之塘海鹽爲大海鹽縣勢濱海延袤一十八里北有乍浦山遠峙三十里外南則秦駐白塔二山夾峙一隅與乍浦相望勢若拱抱而海鹽居其西南之一灣潮水自東北來趨渚洩無歸一遇東北風起怒



潮奔騰推擊勢不可當所恃爲捍蔽者惟土石二塘  
洪武二年肇建石塘焉

川都江堰自秦時鑿江水灌成都田歷代皆用鐵石  
水溢輒復壞洪武九年彭州知州胡子祺易以竹木  
省費利溥民便之

洪武十二年從曹國公李文忠言命陝西西安府穿  
築城中遙引龍首渠水從城東注入民獲甘飲無鹹  
鹵焉

二十三年修崇明海門二縣潮決堤岸共二萬三千  
九百三十三丈役淮揚蘇常民丁二十五萬二千人



百餘人

二十四年築上虞縣海堤四千丈作者萬六千一百六十人是歲脩寧海奉化二縣海堤共四千三百四十丈作者萬一千六百餘人

二十五年濬潭陽縣銀野東壩河道至胭脂河壩共八千三百二十丈作者三十五萬九千九百人

二十六年鑿鬱林州南流北流中隔之江以通舟楫三十一年命長興侯耿炳文發民兵修涇陽縣洪渠又濬堰渠十萬三千百六十餘丈堰故灌田二百里利及涇陽三原醴泉高陵臨潼五縣



永樂元年嘉定縣民程言東吳水利舊有錢塘吳淞婁三江所仰財賦數百萬吳淞一江連跨蘇松東抵滄海西接太湖澱湖之水溢則洩於海海潮則入於湖比年壅塞爲平陸水脉不通五六月間旱高田槪槁至七八月霖水漲溢又盡渰沒民所以典鬻男女蕩析產業甚至棄散逃走而負徵斂上以蘇州知府湯宗不泊徵下獄使原吉詣疏鑿原吉上奏臣行視水利參考輿論得其梗槩蓋浙西諸郡蘇松竄下嘉湖常三郡土田下少高多環以太湖綿亘五百餘里納杭湖宣歙諸州溪澗之水注澱山等湖以入三



拯治之法要在浚滌吳淞諸浦港泄其壅遏以入于海臣謹按吳松江舊袤二百五十餘里廣五百十餘丈西接太湖東通大海然當潮汐之衝沙泥淤積前代屢浚屢塞不能經久自吳江長橋至下界浦約百二十餘里雖云疏通多淺窄處自下界浦抵上海縣南踰浦口可三百餘里灘沙淤泥茭蘆叢生欲卽開浚爲力又大臣相視得嘉定之劉家港卽古婁江徑通大海常熟之白茆港徑入大江皆係大川急流宜濬吳淞江南北兩岸安亭巷浦港引太湖諸水入劉家白茆二港使直注江海又淞江之大黃浦乃通吳



淞要道下流壅塞難卽疏浚傍有范家浜至南踰浦  
口可徑達海宜浚接大黃以達泖湖之水此禹貢三  
江入海故道也上從其言事成復命復言水雖繇故  
道入海而舊河港未盡疏濬恐淺狹淤塞不足經久  
上復使治之命大理少卿袁復副原吉復浚蘇州千  
澉浦致和塘安亭顧浦陸皎浦尤涇共二萬九千二  
十丈浚淞江大黃浦赤鴈浦范家浜共二萬二千丈  
而下流疏通是年復濬通州徐竈食利等港共萬人  
千七十三丈作者萬一千七百餘

六年命平江伯陳瑄脩海門縣捍海岸自南北百二



十餘里作者丁夫四十萬人

十二年脩壽州安豐塘水門十六座及牛角壩抵新  
俞鋪堤萬三千五百餘丈

正統十三年疊溪守禦千戶所以所無井泉就水飲  
馬溝爲番蠻所困巡撫右僉都御史寇深鑿飲馬溝  
水入城邊人以爲功

天順二年脩四川萬工堰可灌田千餘頃名萬工以  
費工也

八年巡撫陝西右副都御史項忠奏西安府城內井  
泉鹹苦飲者輒病舊引龍首渠水從東門以入水道



依山七十里而遙且水利止及南餘三方皆不及城西南皂河相距灌一里許城穿一渠引水從西入令與龍首渠水相濟闔城之民利焉可其奏

杭州本江海故地水泉鹹苦自唐刺史李泌引湖水入城中爲六井然後民足水井邑日富兼可灌田宋守臣蘇軾復鑿爲九渠後漸湮失成化十一年浙江右布政使寧良議錢塘門左湧金門右其間有九渠之一宜可因舊路復濬以通湖水且構橋置閘便來往禦暴漲詔允其議民甚利焉

弘治七年命工部左侍郎徐貫兼右僉都御史理浙



西諸郡水利貫請以主事祝萃從時浙西水道自夏  
原吉濬治之後年久湮塞貫命萃濬吳江長橋一帶  
導太湖水散入澱山陽城昆城等湖泖復開吳淞江  
并太石趙屯等浦洩澱山湖水開茆港白魚洪鮎魚  
口等處洩昆承湖水開斜堰七舖鹽鐵等塘洩陽城  
湖水各注于江海下流疏通乃開湖州縷涇常州百  
瀆洩所受諸山湖水俱入于太湖又開各處斗門以  
洩運河水繇江陰入大江而上流亦通焉是役也計  
修濬河港涇瀆湖塘斗門堤岸百十有五道作者二  
十一萬六千二百八十餘人給口糧一十五萬三千



五百七石論者謂祝萃之功爲多

郎曰自有治河以來議者斷斷乎禁禁乎稍有不行別議鑿濬費不貲矣余觀劉天和潘季馴所論則治黃河在循故道治漕河在沿舊制而已物有小大物之形也情則一而已矣泰山之於丘垤河海之於行潦寧異情者覆杯水於坳堂之上有所濺之則加溢矣有所控之則旁泛矣去其控者而濺可消也黃河雖大何以異此予讀季馴治黃之議但欲循河故道束而湍之使水疾沙刷無畱行而又近爲縷堤縷堤之外復爲遙堤使水益淺遠以不至旁決蓋嘉靖隆



萬之間季馴四治河河皆治